

91. Ita cum filios suos confirmassent hominum domini, ordine matrum suarum, qui in mariti mundum abierant, exsequias peragebant.

92. Tum YAMAS, vatis veste indutus, RAGHUIDEN adiit, dixitque: "Quicumque nos clam colloquentes videre poterit, eum dimitte!"

93. Quod cum rex polliceretur, ille postquam se ipsum ei indicasset, "Summo deo iubente," inquit, "cælum ingredere!"

94. LAKSHMANAS, qui ante januam stabat, etsi illud sciebat, eorum colloquium interrupit, DURVÁSASIS imprecationem timens, qui RÁMAM videre flagitabat.

95. LAKSHMANAS, devotionis gnarus, ad *Sarayuis* ripam profectus, vita relictā fratris sui majoris promissum verum reddidit.

96. RAGHUIDES vero, cum hæc ejus quarta pars ante ipsum in cælum evecta esset, vacillans stabat, veluti virtus tribus pedibus insistens.

97. Qui cum in *Kusāvati* urbe confirmasset KUSAM, hostium elephantis similium uncum, et in *Sarāvati* urbe LAVAM, qui pulchris sermonibus hominum bonorum lacrymas eliciebat:

98. Sursum evectus est, firmo animo præditus, una cum fratre minore, igne præeunte, atque per domini sui amorem eos secuta est *Ayodhya* urbs, ædibus exceptis.

99. Simii et *Rákshasi*, animi gnari, sequebantur ejus vestigia, rigata civium lacrymis, *kadambæ* florum instar magnis.

100. Per illum, curru cœlesti vectum, erga cultores suos benignum, *Sarayus* fluvius scala facta est, eos, qui ipsum sequebantur, in cælum ducens.

101. Quia hominum in illum fluvium descendentium concursus bovinum gregi similis erat, ideo sacer ille ablutionum locus *Goprataræ* nomine in mundo celebratur.

102. Dominus ille, cum deorum portiones suam quæque formam rursus induissent, civium caussa qui immortales facti erant, alterum cælum condidit.